



KENYATAAN MEDIA

SITUASI TERKINI JANGKITAN COVID-19

DI NEGARA BRUNEI DARUSSALAM

28 Zulhijjah 1441 / 19 Ogos 2020

1. Kementerian Kesihatan ingin memaklumkan kepada orang ramai bahawa pada hari ini, Rabu, 28 Zulhijjah 1441H bersamaan 19 Ogos 2020M, **satu kes baru** jangkitan COVID-19 telah disahkan di negara ini. Ini bermakna **jumlah keseluruhan kes COVID-19 di negara ini meningkat kepada 143 orang.**
 - Kes 143 ialah seorang wanita berumur 31 tahun yang tiba ke Negara Brunei Darussalam dengan penerbangan Diraja Brunei BI874 pada 12 Ogos 2020 melalui Kuala Lumpur dari Timur Tengah. Kes ini telah dikesan melalui program saringan ujian swab COVID-19 bagi sesiapa yang baru tiba ke negara ini dari luar negara. Beliau tidak mempunyai sebarang tanda-tanda jangkitan dan pada masa ini sedang dirawat di Pusat Pengasingan Kebangsaan. Kementerian Kesihatan telah mengenalpasti seramai 42 orang kontak di mana 34

orang daripadanya telah menjalani ujian swab COVID-19 dan disahkan negatif manakala selebihnya masih menunggu hasil keputusan ujian. Kesemua kontak sedang menjalani kurantin di bawah Akta Penyakit Berjangkit Penggal 204.

2. Sementara itu, Kementerian Kesihatan juga ingin memaklumkan bahawa Alhamdulillah pada 17 Ogos 2020 yang lalu, Kes 142 telah pun dikeluarkan dari Pusat Pengasingan Kebangsaan setelah sembuh dan disahkan negatif ujian COVID-19.
3. Disamping itu, seramai **639 orang** sedang menjalani pengasingan diri mandatori di pusat-pusat pemantauan yang disediakan oleh Kerajaan di mana jumlah keseluruhan mereka yang telah menamatkan pengasingan diri mandatori sejak Mac 2020 ialah 4,366 orang.
4. Dalam tempoh 24 jam yang lalu, sebanyak **555 sampel** telah diuji bagi virus SARS-CoV-2 yang membawa jumlah keseluruhan ujian makmal dijalankan sejak Januari 2020 kepada 49,399 ujian.

5. Sementara itu, Kementerian Kesihatan ingin menerangkan mengenai berita berkenaan dengan tiga orang warganegara Indonesia yang telah didapati positif COVID-19 sebaik sahaja tiba di Surabaya, Indonesia daripada Bandar Seri Begawan pada 9 Ogos 2020 yang lalu. Sehubungan dengan ini, sejurus setelah menerima maklumat demikian pada 13 Ogos 2020, Kementerian Kesihatan telah segera membuat penyiasatan kontak bagi ketiga-tiga kes berkenaan di mana 42 orang kontak telah dikenalpasti. Kesemua mereka telah menjalani ujian swab COVID-19 dengan segera dan pada 15 Ogos 2020, kesemua kontak telah disahkan negatif. Pada masa ini, mereka sedang menjalani kurantin di bawah Akta Penyakit Berjangkit Penggal 204.
6. Maklumat terkini yang diterima daripada Kementerian Kesihatan Republik Indonesia, Alhamdulillah ketiga-tiga orang warganegara Indonesia tersebut telah kini disahkan negatif COVID-19 dan dibenarkan pulang ke rumah.
7. Sementara itu, Kementerian Kesihatan juga ingin menekankan dan mengingatkan kepada orang ramai untuk terus menerus mematuhi segala arahan yang dikeluarkan oleh pihak Kerajaan serta mengamalkan tanggungjawab

sosial masing-masing dengan mengamalkan kebersihan diri, etika bersin yang betul, digalakkan memakai sungkup muka (*face mask*) apabila berada di tempat-tempat awam yang penuh sesak dan jika merasa kurang sihat, tidak menghadirkan diri ke tempat-tempat awam dan majlis-majlis keramaian.

8. Di samping itu, orang ramai juga digalakkan untuk menggunakan applikasi BruHealth dan mengimbas kod QR setiap kali apabila masuk dan keluar dari premis-premis terutama sekali di tempat-tempat awam seperti gedung-gedung perniagaan, kedai-kedai runcit, restoran-restoran, establishmen kecantikan, kedai gunting dan lain-lain. Oleh yang demikian, pengurus-pengurus premis berkenaan adalah dinasihatkan untuk mencetak dan memaparkan QR kod di tempat-tempat masuk masing-masing. Orang ramai juga disyorkan untuk mengambil serius dalam penggunaan applikasi BruHealth terutama sekali dalam mengimbas QR kod ini kerana ia adalah penting dalam membantu Kementerian Kesihatan melaksanakan pengesanan kontak (*contact tracing*) dengan segera, jika berlaku sebarang penularan jangkitan.

9. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu **www.moh.gov.bn** atau menghubungi **Talian Nasihat Kesihatan 148** atau melalui aplikasi **healthinfo.gov.bn**.

- TAMAT -

Rujukan : KK/PR/2

Tarikh : 28 Zulhijjah 1441H / 19 Ogos 2020